

重修兩淮鹽法志

兩淮鹽法志卷三

王制門

制詔

道光元年二月內閣奉

上諭孫玉庭奏查明淮商辦運情形請停止淮南北口岸鹽斤加價一摺鹽斤有妨正課民食前經該督等奏請停止原不難降旨准行特以減價之後是否卽能敵私有裨國課民食飭令該督等通盤籌畫切實陳奏茲據查明商運致敝之由與其務加價之虛名而轉礙正課不若輕商人之運本而利捷轉輸自係實在情形著照所請自辛巳綱爲始所有淮南

同治縣志卷三
北綱食各岸鹽斤加價概行停止以紓商力欽此

道光元年三月二十四日內閣奉

上諭曹振鏞議奏兩淮鹽政緝私事宜一摺兩淮引地寬廣與川粵浙閩等省處處毗連鄰私四出侵銷致虧額賦自應加以整頓著通飭四川廣東浙江福建及山西河南各督撫鹽政飭令各官商等恪守界址按制行鹽如有越境私販及巡防員弁賄縱情弊立即嚴拏究辦以杜透漏至鹽梟拒捕事所時有地方文武各官因處分過嚴轉多諱飾著卽照吏兵二部所議量從寬減其拏獲人犯無庸一概解省分別訊辦以省拖累所獲鹽斤等項卽聽該兵役自行變價充賞俾免

侵漁惟是鹽務弊竇多端緝私特其一節凡官引之夾帶商人之行私其弊有甚於私販者著該督撫鹽政等實力查禁毋託空言弊源旣清鹺務自日有起色矣欽此

道光元年五月二十一日內閣奉

上諭孫玉庭等奏查明未運殘引懇請一體停免加價一摺鹽斤加價有妨正課民食前經降旨將淮南北綱食各岸鹽斤加價概行停止茲據該督奏稱減免加價應自辛巳綱爲始除辛巳以後分綱帶運各引照正綱一體停加及已運未銷應賠銀兩按引分攤外惟淮北戊寅己卯淮南己卯庚辰各綱尙有未請未運未銷之引旣未便照舊加售使新殘價值

兩歧又未便令商人加納致轉輸更形竭蹶亦係實在情形
著加恩准其將辛巳以前未銷殘引一律停免三釐加價以
歸畫一欽此

道光元年六月初六日兩淮鹽政延豐奏籌辦收買淮北
餘鹽奉

旨此事甚有關繫汝同孫玉庭細心覈辦總在虛心實力慮及
久遠慎勉而行欽此

道光元年六月兩淮鹽政延豐奏詳籌淮南疏引裕課奉
旨此是要緊處恐言之易而行之難也欽此

道光元年七月十七日內閣奉

上諭前據孫玉庭奏淮鹽運至楚岸應停止封輪之法改復散賣舊章以利疏銷當交陳若霖查覈妥議具奏茲據奏稱查明見在楚岸積鹽自上年十一月起至本年五月底止未經開封鹽船尙有四百十三隻此時若令全行開售恐變法太驟一時疏銷不及鹽行水販壓價賒欠有力者爭買新鹽舊鹽停積商本愈虧船戶水手不下數千人一聞散賣之信均思卸載紛紛爭鬧勢所必然總須妥籌全局逐漸疏銷等語所奏自係實在情形著照所請先將存積最久之上年十一月十二兩月到岸鹽船儘數開售俟銷售將竣再將本年正二兩月到岸之鹽接手開售以後均照此辦理俟見在積存之

引銷有成效續到之鹽易於流通再令隨到隨賣以廣疏銷
若行之日久各商辦鹽踴躍岸鹽有存積過多爭先搶賣者
則隨時暫封仍不得過兩月之限似此逐漸疏通自可不至
因革弊而先受變法之累也欽此

道光元年十月初六日內閣奉

上諭軍機大臣會同戶部議覆兩淮緝私功過章程一摺兩淮
引地遼闊私販來往稽察難周從前因設巡未當每致虛糜
經費茲於儀徵海州及洪澤湖等處扼要地方酌派弁兵實
力巡防其課功給食亦明定章程巡費多寡計鹽覈給弁兵
薪水酌中定數並嚴互報以杜假借裁加犒以除冒濫均著

照所議辦理惟是鹽務弊竇叢生若商人等自行放租夾帶藉官掩私有非巡緝弁兵所能查察者著該鹽政嚴飭監掣各官實力盤驗如有徇縱據實參處其竈產存鹽尤須覈實毋得以多報少通同隱漏務期諸弊廓除以肅鹺政欽此

道光元年十二月二十五日軍機大臣等奉

上諭英和等奏查明兩淮陳欠銀兩分限帶徵每年應交銀十五萬九千九百兩自分限後仍欠至一百十九萬餘兩之多其應交火器營兩翼八旗生息銀兩前經奏准由銀庫墊發再有領項不敷支放酌令將兩淮欠交銀兩先交十分之二嗣後務須年清年款等語廣儲司銀庫銀兩均須隨時動用

若應解之項交納逾期恐致不敷支放兩淮應交欠項前經分別豁免展緩玉貢折價銀兩又復停止交納其應交各款更不應再有延緩著該鹽政將兩淮應交銀一百十九萬餘兩先行解交十分之二銀二十三萬八千餘兩限於道光二年二月解到以備應用其餘欠交銀兩上緊依限完繳欽此
道光二年五月二十七日內閣奉

上諭曾燠奏請立限清查運庫一摺所奏是兩淮運庫自嘉慶十一年清查以後迄今已閱十六年款項輾轉日深自應徹底清釐以除積弊惟頭緒紛繁恐尅期難以竣事著照所請卽以該鹽政到任之日扣起立限一年督同運司悉心查辦

覈明懸欠內外各款若干未運歷年積引若干並將奏准展緩各款造具清冊照依原定年限按綱分別帶徵嚴催各商請運務使銀引數目相符殘積漸清庫貯悉歸覈實欽此

道光二年六月二十五日軍機大臣等奉

上諭據孫玉庭奏接兩淮鹽政曾煥鈔寄覆奏御史條陳鹽務事宜摺稿內有輪規當散一條曾煥意在整輪該督以兩次接陳若霖信楚省自上年散輪後商人極見相安並無跌價搶賣之事若散售未久仍復整輪水販必致觀望民間將虞淡食並據運司錢寶甫前在湖北鹽道任內稟稱未經封輪以前及封輪以後商運暢旺消乏情形指陳最爲明白請交

湖廣督臣確查實在岸情隨時制宜再行定議施行等語此事前據曾燠奏稱封輪章程行之年久商販相安自散輪之後爭先搶售跌價水販乘機壓勒於國課民食均無裨益請照舊封輪銷售輪規之整散關乎銷引之暢滯而疏引裕課以漢岸爲重督銷專責尤在楚省熟籌辦理著陳若霖詳查楚岸見在情形是否必須散輪抑或照舊封輪之處悉心妥議具奏務期鹽引暢銷商本無虞虧折小商不致守候方爲至善不可稍有回護欽此

道光二年七月二十九日軍機大臣等奉

上諭前據曾燠覆奏御史條陳鹽務事宜當經軍機大臣會同

戶部覈議奏稱摺內輪規一節自散輪後較封輪時究竟暢銷與否商人是否情願封輪請飭兩江湖廣總督會同該鹽政秉公查議已有旨依議行矣此事前經孫玉庭奏接陳若霖信據稱楚省自上年散輪後商人極見相安若散售未久仍復整輪水販必至觀望等語業經有旨諭令陳若霖詳查楚岸情形妥議具奏茲復據孫玉庭奏札詢陳若霖復稱自去年七月散輪後至今年五月所銷鹽數較前歲多至十七萬九千餘引商鹽賣給水販既未於例價有減而民間買食之鹽比前較賤是散輪之裨益商民實有成效而揚商乃有漢岸搶售跌價水販乘機壓勒每包照例價虧跌七八分之

語難保非商船夾帶淮私漁利希冀封輪扳價是以揚商具稟鹽政獨有虧折難堪之言等語輪規之整散卽銷引之暢滯攸關該督等意以散輪爲有裨鹽務而曾煥以爲必須整輪著孫玉庭會同陳若霖曾煥通盤籌計務須和衷商榷妥議具奏總期鹽引暢銷商本無虞虧折於國課民食兩有裨益方爲至善欽此

道光二年八月初六日內閣奉

上諭陳若霖覆奏查明楚岸散輪後銷鹽暢旺情形請無須照舊封輪又據曾煥奏上年散輪後商船搶售水販挑剔眾商觀望陳明議整輪規實情各一摺此事前據孫玉庭因曾煥

有輪規宜整之議將楚省上年散輪後商販踴躍情形具奏當交陳若霖詳查妥議茲據奏自上年散輪之後各路水販雲集向來官引未能流通之處客販亦源源而至一年之內比較封輪之年共溢銷鹽二十六萬四千餘引行銷實爲暢旺商船水販並無搶售跌價乘機壓勒等事湖南湖北兩省各州縣民間食鹽價值較減若復整輪挨售在水販稽留觀望不能源源買運而大商把持壟斷擡價加耗民有食貴之虞私梟卽得以充斥仍請散輪銷售而曾煥復請整輪以培商力輪規之整散原爲恤商以便民如專顧商情有礙民食其流弊豈可勝言旣據陳若霖查明散輪後商民兩便並無

同治十二年九月二十九日內閣奉
搶售壓勒之事著照所議仍行開輪銷售儻實有商情未協之處俟試行一二年後再將實在情形奏明辦理該督等不得因定議在前稍存迴護遷就之見以致累商誤運欽此

道光二年九月二十九日內閣奉

上諭孫玉庭等奏商控領借銀兩審明賠繳歸款一摺此案散商鄭同瑞等控告首總黃滌泰等浮領銀兩見據孫玉庭等審明具奏除各總商於道光二年兩次領銀六十萬兩係自行公借營運仍照原定年限歸還外其嘉慶二十五年公同領借己卯庚辰二綱展緩案內撥還癸甲積款及辛工餘存銀七十三萬五千兩雖因辦公虧累究係歸還積款自應飭

令公同賠繳首總黃滌泰辦理不善據認賠繳銀三十萬兩
著卽於本年辦公事應領銀內扣繳其餘銀四十三萬五千
兩卽著落公同具領請借之各總商分賠於道光三年起分
限四年繳還所有此項賠繳銀兩著全數仍歸己卯庚辰展
緩款內於乙酉等綱畫除免徵該總商黃滌泰等訊無侵冒
與稟控有因之散商鄭同瑞等俱著免議嗣後兩淮辦公一
項祇准以七十萬兩爲額不准稍有逾浮如果實於年例之
外另有應辦公事隨時酌定另辦以昭覈實欽此

道光二年十二月初二日軍機大臣等奉

上諭曾燠奏遵旨查明年內應解京外各餉逐款開單呈覽一

摺兩淮年內應解京外各餉除業經起解外尙有一百七十
九萬餘兩之多皆係歷年懸墊積壓所致若令如期解清實
屬趕辦不及著照該鹽政所請將應解戶部八旗養廉八旗
生息宗人府利息並內務府舊欠院司節省豐和典利江振
鴻利及步軍統領衙門修理京營柵欄等款均卽先解一年
俾資應用其應解南河節省河餉駁船利息並蘇松各糧道
幫船生息亦俱先解一年其餘欠解京外各餉准其暫行展
緩一俟畫清懸墊著卽徹底趕解清楚毋任宕延此後該鹽
政務督飭該運司嚴催請運使徵解相符不可再有積壓欽
此

道光二年十二月初五日內閣奉

上諭曾燠奏銷引考覈參差請畫一辦理一摺兩淮銷引各岸向例奏銷本綱錢糧時題報考覈淮北係按州縣缺銷分數開參楚西則既報全完復按年覈其缺銷分數將各鹽道奏參江南省安池太綱鹽及各食岸又俱按年奏報開參辦理本未畫一考覈銷引祇應通計一年銷數有無缺溢若按年考覈之外又復按綱考覈徒成虛報具文著照所請准其將楚西淮北按綱題報考覈之件卽行裁革除淮南銷引業經考覈參處外所有楚西淮北與安池太及各食岸均自道光二年爲始一律按年考覈彙案奏報如有缺銷照例開參欽

此

道光二年十二月二十七日內閣奉

上諭孫玉庭等奏儀徵河道捐費未齊請先借款趕辦一摺儀徵爲淮南引鹽匯集之地屯船由江都縣屬三汊河等處運行從前俱係商人急公捐辦未動充公之款嗣因商力疲乏久未興挑以致三汊河及子鹽河五閘一帶淤淺幾成平陸而沙漫洲江口漲出沙灘一片口內復漲起沙埂一道橫亘河心屯船改由江面荒洲掣捆大船移泊老河涇地方卽銅漕各船亦皆改道由長江直下而內河一帶居民不能引水灌溉近來瓜洲轉江之魚尾一帶淤淺不能抵洲掣捆待潮

起撥浮費愈增茲據該督等勘明該處內外河道爲通江達淮要津於水利田疇民生商運實有關繫見在積淤已甚若俟捐費齊全始行挑辦商民愈困自係實在情形著照所請准其於江皖各藩庫借撥銀二十四萬兩先行趕辦該督等派委諳練人員督商覈實興辦仍令按引捐帶陸續解還藩庫限至道光六年全數歸清毋庸報銷欽此

道光三年四月二十三日軍機大臣等奉

上諭本日都察院奏淮南商人鄭同瑞遣抱告孫祥以總商隱混欺朦等詞呈控並黏單呈覽已明降諭旨交韓文綺延隆秉公查辦具奏矣此案據鄭同瑞呈控淮南總商黃滌泰等

上年侵欺庫項審明屬實罰賠銀兩未治以侵欺之罪仍派領辦事件復呈請總督鹽政奏畫辛巳壬午癸未三綱撥抵懸墊及攤還息本二項懸墊一款共銀九百四十四萬七千五百餘兩其中有不應提出分年之款必須查明欠解京外各餉實數以杜畫抵侵欺之弊至息本一款共銀七百七十二萬二千二百餘兩近年庫存閒款因總商領用過多以致支絀今令先繳本三百萬兩餘銀另籌生息若非專借公借從何另籌再專商領本多年攤利已久今仍令通綱先還致眾商攤本帶利重複虧累又每年辦貢辦公定限七十萬兩向係按年爲期今忽改於五月十五日截止前後套搭以致

領項復逾七十萬之數又辛壬癸三綱內有給單籌還經費一百四十萬兩尤係朦混支銷等語兩淮懸墊息本各款前經孫玉庭等查明登覆懇請恩施朕念商人疲乏格外施仁當降旨准其分綱分年攤徵完款茲該商鄭同瑞復以該總商等侵欺隱飾諸弊黏單呈控事關鹽課帑項至一千七百余萬之多如有挪移朦混情事是以朝廷調劑之恩遂商人侵欺之計不可不嚴行查辦著韓文綺會同延隆將原呈黏單內所控各款秉公詳查據實具奏不可稍有瞻徇含混欽此

道光三年十一月初八日內閣奉

上諭戶部覈議曾燠奏清查庫款並立定章程一摺兩淮運庫徵解款目繁多積年輻輳朕屢次加恩分別扣停豁免以期嵯務日有起色見經戶部將清查各款逐一查明著該鹽政嚴督運司逐款照數徵還不准絲毫拖欠亦不得再有墊撥並自甲申綱奏銷爲始將該年正雜帑利等銀專疏具題其文冊內先列各項額徵總數再分管收除在四柱務使款目瞭如毋許籠統開造至分帶積年銀款亦著自甲申綱起照長蘆浙江之例另繕疏冊隨同奏銷一律題報此後懸欠分綱帶完額徵新課必須年清年款剔除弊端如再有新舊率混藉詞積壓情事惟該鹽政是問欽此

道光四年四月二十一日內閣奉

上諭御史蔡學川奏請嚴禁幕友濫邀議敘一摺所奏是朝廷議敘之典原所以鼓勵人才至幕友襄理幕務由本官自行延請與在官供職者不同若以有職人員舍官就幕遂得濫邀甄敘既難免大員市恩瞻徇等弊且恐開各項人員規避取巧之端嗣後各督撫鹽政等奏請一切議敘概不准將幕友保列以杜冒濫欽此

道光四年四月二十二日內閣奉

上諭孫玉庭等覆奏鹽務事宜一摺前因御史董國華條奏兩淮鹽務應辦各款當經降旨交該督等逐一詳查具奏茲據

就實在情形酌請隨宜辦理各場產鹽豐旺必須設立垣座認真收買餘鹽循環銷運既免壅積兼可杜竈戶透漏之弊淮南向已辦有定規惟淮北商力素疲運銷支絀應再酌立章程以專責成所有前奏南商協濟銀款內撥出之二十五萬兩著該督等籤派殷實妥商二三人查明場產餘鹽給銀儘產儘收發運出場在淮所設垣堆貯掣交淮北需鹽口岸專商納課領運將繳價轆轤收買務使餘鹽儘數歸官私販自可漸絕至淮所既設官垣著卽作爲公埠以備長年撥運各岸濟售無庸另在正陽關添設公所又南商見在資本僅敷自運淮北鹽務著仍督令北商經理毋得仍前玩誤該督

等務須隨時整飭俾課食兩裕以裨釐務欽此

道光四年八月初二日內閣奉

上諭孫玉庭等奏會議江西鹽務杜弊緝私章程一摺江西鄰私最易侵越粵私尤甚粵鹽引地多在江西上游近年粵鹽滯銷專藉江西之南安贛縣信豐會昌興國等埠爲該省暢融之地至萬安縣方爲淮引地界該縣芙蓉門兩岸江面設卡堵緝每多懈怠著阮元嚴飭該省運司遵辦各銷各引並將粵省商運額數清釐知照江西稽查以別官私卽因粵省綱滯不能不有融銷亦酌量引地可融若干明定限制以清來源再於芙蓉門兩岸飭鹽道親往查勘移會南贛鎮選派

參遊大員添帶弁兵並增設巡船扼要堵緝遇有大夥私梟
准放鳥槍格殺勿論非大夥拒捕不得擅放仍將見在懈巡
各員及地方官指參分別嚴加議處毋稍瞻徇至商鋪擡價
病民亦宜查禁著將官鹽例價按照銀錢市價每斤應折定
若干隨時示諭以杜弊混至糧船夾帶大千例禁嗣後除經
過江南江西按段專派搜查如不服盤查將丁舵治罪押運
各員參處外並著天津鎮道每屆回空查禁囤販毋許偷運
再於經過關津查貨之便順查有無夾帶私鹽一經查出卽
飭入官嚴拏帶私之人治罪餘免深究催趲開行其餘商民
船隻並著各關監督諭令查稅人等並查有無夾帶私鹽除

途中食鹽不計外如十包以上至五十包者即將多出包數入官充賞船仍放行儻在五十包以上鹽包入官究明起意帶私之人按律詳辦船仍放行免究欽此

道光四年九月十八日軍機大臣等奉

上諭前據陳若霖議覆湖廣行銷淮鹽無須照舊封輪當降旨仍行開輪銷售俟試行一二年再將情形奏明辦理茲據李鴻賓奏散輪跌價搶售之弊實所難免見議立公局籤派妥商經理無論鹽船到岸先後將小商之鹽隨到隨賣大商之鹽按各家所到引數公同合計逐日均勻派銷俟試行兩月再將議定章程具奏等語湖廣行銷淮鹽封輪挨售小商每

致向隅大商把持壟斷民有食貴之虞而散輪售賣仍恐私
跌搶賣成本虧折自應熟籌商民兩便之策著李鴻賓先將
近日酌辦漢岸清形試行兩月悉心體察如果鹽引暢銷價
無例外之加民亦無虞買食之貴於商民均有裨益卽將議
定章程會同孫玉庭曾燠具奏再降諭旨欽此

道光五年三月十一日內閣奉

上諭魏元煜等奏體察兩淮鹽斤加價情形另籌以應工需並
請統綱引以便分帶各一摺前據阿爾邦阿奏請鹽斤加價
以濟工需當交該督等體察見在情形覆奏茲據奏稱兩淮
成本較重若再請加增必致滯銷徒有加價之名而無濟公

之實益起鄰私侵灌之弊自係實在情形所有兩淮鹽斤加價著毋庸議其淮商等呈請捐備河費銀六百萬兩以濟工需見在南河工程朕不惜帑金業經籌款撥用無須該商等捐辦其清查案內一切停扣息本捐帶等款仍遵照原定章程自甲申起按三十綱分別徵還所請變通章程銑綱引項便分帶之處著不准行欽此

道光五年四月初五日內閣奉

上諭前據程祖洛奏鹽斤加價章程當令候旨遵行嗣各督撫鹽政先後奏到兩淮成本較重兩浙額引見未暢銷已降旨無庸議加其行銷蘆鹽之直隸山東據稱加價尙不病民

並諭令依議辦理豫省祥符等五十三州縣行銷長蘆引鹽
商邛等九州縣行銷山東引鹽見在鹽價本不甚昂每斤加
價二文尙屬平價仍可敵私民間計口買食所增無幾不至
食貴病民於工需亦屬有濟著卽照所請覈實辦理隨時報
解至該省行銷淮鹽之光州等十四州縣著照兩淮奏准章
程無庸議加欽此

道光五年六月初九日內閣奉

上諭曾燠奏彙覈淮南北綱食各岸銷鹽總數一摺據稱兩淮
綱食各岸道光四年分銷數惟湖廣省照額全銷此外江西
缺銷鹽八萬二千八百一引江南安慶等府州缺銷鹽八萬

五千八百八十二引江南鳳陽等府州並河南汝甯等府州
缺銷鹽六萬二千二十三引等語兩淮鹽務積疲已久近年
以來曾經嚴立章程緝拏梟販官引自應暢銷乃此次各岸
缺銷額鹽尙有二十餘萬引之多豈得以比較道光三年分
銷數稍有加增便可塞責除見據該鹽政已將缺銷之各該
鹽道州縣咨部議處並嚴催壽州鳳臺二州縣開報銷數查
取遲延職名另行咨部外該鹽政務當認真辦理課運實力
督銷並著各該管督撫嚴飭所屬文武員弁一體堵緝私梟
疏銷官引務期額鹽暢售以裕國課如再不能足額卽將督
銷不力之該管各員嚴行參處毋得視爲具文致干重咎欽

此

道光五年十月初四日兩淮鹽政曾燠奏淮北運阻商疲
奉

上諭看汝如何奏辦若祇知乞恩二字孰不能之大非簡任之
意矣勉之懍之欽此

道光六年二月初一日奉

上諭御史陳肇奏請飭禁鹽商浮春鹽斤一摺鹽務積弊已久
近年屢經嚴緝私梟官引仍未暢銷如該御史所奏山東鹽
引每引浮春多至三五十斤至百餘斤不等通計山東每年
五十萬引多春五千萬斤抵官引二十餘萬道一經控告或

將鹽包戳漏或澆水滲消官吏得規袒護一省如此各省恐亦不免果有此弊必當嚴行剔除著山東巡撫認真飭禁并著有鹽省分之督撫鹽政運司各官嚴行查辦嗣後銷引不暢卽將掣鹽各官從重議處查出商人浮春斤數亦著照私鹽例治罪務令浮春之弊與私梟並除以肅鹺致欽此

道光六年二月初十日內閣奉

上諭琦善奏拏獲私梟訊出透私包庇等弊請將失察各員寬免處分等語近來私鹽充斥總由竈丁透漏私煎兵役得規包庇以及梟犯出境入境製造違禁器械該管官慮干處分往往回護徇縱茲經該督飭屬拏獲梟犯二百餘名將透私

包庇根追得實從重懲治辦理尙屬認真著加恩將地方文武及鹽務官員從前失察處分免其參處經此次格外施恩該督務當飭令各該管官始終奮勉俾梟徒及不肖竈丁兵役咸知斂迹場務漸可肅清毋得日久生懈並著該督移咨湖廣江西各督撫一體督飭文武印委各員認真躡緝務將大夥私梟隨時捕獲盡法懲創不得僅以拏獲零星肩挑負販塞責若地方著名梟匪該管官事前既無覺察事後又不訪拏卽著據實嚴參毋稍寬貸欽此

道光六年九月初十日軍機大臣等奉

上諭阿爾邦阿奏請仍復鹽斤加價以濟要需一摺據稱見在

軍需與河工並舉需用浩繁請將兩淮兩浙廣東等省鹽價按照嘉慶十四年成案照舊一體加價等語上年因高堰要工需用甚鉅據阿爾邦阿奏請加價以濟工需當交各督撫鹽政悉心酌議嗣兩淮以成本較重兩浙以銷引未暢加價必致滯銷議覆惟行銷蘆鹽之直隸山東河南等處奏稱加價並不病民議請每斤加價二文均照議辦理朕思從前嘉慶年間奏准加價行之十有餘年商民相安自二十五年停止以後各處銷引仍未見通暢是滯銷總由緝私不力並非加價所致頃因逆回滋事調兵進剿撥餉甚多南河啟壩挑河修築高堰工用浩繁國家經費有常自應寬爲籌備除長

蘆行鹽引地業經加價外著各該督撫鹽政體察情形查照舊例妥議具奏總期實有裨於國用仍不致累商病民方爲妥善欽此

道光六年十二月初三日內閣奉

上諭御史汪琳奏淮鹽積滯請嚴飭緝私一摺各省行銷鹽引地方每因鄰私侵灌以致官鹽滯銷如該御史所奏各省偷漏之弊所在皆有兩淮引地遼濶私販尤多該地方文武果能認真緝拏何至私梟充斥無如派委巡緝之官弁兵役始而得規包庇繼而畏兇縱放轉將零星挑負窮民需索擾累於大夥梟販則置之不問卽閒有督撫奏明設卡緝私旋即

視爲具文有名無實何以肅鹺政而靖地方著江蘇安徽閩浙廣東廣西湖北湖南四川各督撫嚴飭印委文武各員認真訪察實力堵緝將結夥私梟嚴拏務獲分別功過以示勸懲毋再疏縱干咎至商人向有放租夾帶藉官售私以及違例重斤情弊責成各鹽政及兼管鹽政各督撫嚴飭監掣之員於引鹽過掣時務須覈實盤驗如有徇縱卽當嚴參究辦又該御史所奏淮南北煎曬鹽數向由運司給發循環號簿令場員按日登記分別一月半月查報以杜漏私近來場員並不遵辦以致竈丁貪利售私而鹽之交商者轉少並著察看情形飭商盡力收買毋任竈丁透漏以清弊源欽此

道光七年正月十九日內閣奉

上諭琦善等奏覆查淮鹺積重情形據實陳明一摺前據張青選奏兩淮鹺務積重難返見在設法辦理並請將最爲疲敝之淮北商人一律借給底馬以資趕運以所奏未能明晰飭當交該督會同該鹽政逐款分晰陳奏茲據查明引積課懸商疲運絀各情形淮北商人積疲已久復因連年運道梗阻鹽池被淹成本虧折困乏誤運在該商等懸課未清自難再加調劑而岸鹽攸關民食亦不得不量爲通融著照該鹽政前奏准其照從前借馬成案一律借給底馬自請程之日起限六箇月完繳轆轤借給如逾限不清卽將岸鹽封抵停其

後借仍將該商究辦其從前借馬未完之項仍照清查案內
奏定章程分綱帶繳一俟商力稍紓該督等隨時奏請停止
至所奏帶銷融銷緝私整輪各事宜該督等當認真督辦不
可徒託空言張青選曾任兩淮運司見既將淮鹺致弊之由
及如何補救之方探本窮源詳加考證如有應行籌辦事宜
著卽會同琦善逐細籌商妥議奏明辦理鄭祖琛係初任運
司一切情形未必如該鹽政熟悉不必俟該運司到任商辦
再行具奏也欽此

道光七年二月十三日內閣奉

上諭各省鹽務項下每歲應完正雜課款均須按年清交間遇

鹽引滯銷商力拮据經該督撫鹽政等奏到朕無不立沛恩施量予展緩該商人具有天良自當依限交納乃視爲具文新陳積壓各督撫鹽政等並不嚴定懲勸實力督催以致帑項虛懸殊非實心辦公之道本日戶部將各省節年欠交一切正雜課銀分別開單呈覽除奏明分限帶徵應令各按年限徵收外見在屆限未完銀四百二十餘萬兩內有正項錢糧並未緩徵而不徵完者有雖係雜項錢糧久逾年限並未徵完者經該部分案行催延不徵報似此任意遷延日積月多於經費大有關繫著通飭長蘆兩淮兩浙雲南廣東各該管督撫鹽政嚴飭所屬運使鹽道等查照戶部單開未完銀

兩迅卽勒限催徵歸款毋許絲毫拖欠仍按限將已未完分
數據實報部查覈經此次飭催之後儻再藉詞延宕仍致有
名無實定卽懲處不貸欽此

道光七年三月十九日奉

上諭前據琦善奏籌辦淮南鹺務事宜各條當交戶部覈議茲
據逐款查明所請先銷售引以清界限一節兩淮引課自道
光四年奏准展限之後迄今兩載有餘舊引仍前壅滯茲復
請展限報銷將丙戌以後奏限全行推緩所奏斷不可行至
乙酉綱應完正課僅三十八萬八千餘兩若令商人先銷乙
酉綱以前殘引轉將正課積壓亦屬有名無實著該鹽政仍

將丙戌引課趕緊催完務於本年六月奏銷無許延宕又該督等請將己丑等五綱應完提引等本解部銀三百萬兩自丁亥綱起分作四綱歸繳丙戌等三綱應完賠課解款銀三百九十餘萬兩自辛卯綱起分作三綱歸繳是竟借商捐爲名將見年應報丙戌一綱帶款停緩不交殊非實力辦公之道此外內外帑本銀三百四十餘萬兩前准仍留通綱生息茲復請提還運庫爲各商隨時借領之需此項甫經追完旋復借給徒滋轆轤尤屬難行著該督等將各綱應行歸繳銀兩仍照清查案內奏定年限以次徵完不得率議更章致滋弊混再兩淮自嘉慶十年奏准每引加鹽十斤節經該鹽政

奏請展限上年議定截至丁亥綱爲斷茲該督等復以商力
消乏場價驟增請於前加十斤之外再加十斤自爲商力拮
据起見著准其新舊共加鹽二十斤俾資貼補自戊子綱起
扣足三年卽行停止以示限制至清釐岸店積弊著查照此
次議定章程卽飭運司鹽道慎選殷商分別甄汰無許影混
滋弊如抗違不遵從重懲治又另片奏請將楚西加價銀兩
俟商人到岸銷售後始行繳庫收解售鹽遲速不齊交價必
遷延不定挪移侵蝕勢所不免該督等應仍遵照舊定章程
無論楚西江皖等省概令於赴司請引時卽將加價完交司
庫由運司三月造報一次聽候撥用無許遲延兩淮鹽務日

敝朕念商力疲乏停止每年玉貢折價銀五十萬兩復將商捐未解銀五百餘萬兩全行豁免其積年各項欠交銀數幾及四千萬兩准令分年帶完近又准復整輪舊規不得取巧跌售各商渥被恩施自應力圖報稱該督等惟當加意整飭設法督銷以期日有起色國家經費有常不得爲調劑目前之計屢請加恩也欽此

上諭所奏均悉以見在情形而論緝捕西省銷鹽各口岸之私梟及查禁場竈之偷漏爲第一急務爾當如何激發天良實力報效務要勉之又勉朕拭目以待欽此

道光七年十二月軍機大臣等奉

上諭有人參奏江蘇著名劣幕平二愚卽平衡前於嘉慶年間在兩江督署婪賄招搖被參驅逐嗣又在兩淮鹽政幕中營私舞弊經前督臣孫玉庭押逐回籍近年復在總商黃灤泰家辦理商務交通當事前鹽政曾燠爲其所惑致離務毫無整頓上年張青選到任後又加信任所有引銷事宜及一切奏摺俱係該劣幕在黃灤泰家主辦總商等聽其指揮每年幫送萬金復遇事婪索前後所得私款不可計數伊姪平翰以佐雜候補不數年洊升知縣伊子亦援例報捐等語各直省衙門延致幕友幫辦文案原不許擅自出入致滋弊竇該

劣幕平二愚卽平衡若係鹽政幕賓衙署例有關防不應在外居住仍代商人辦事若係商夥又何得與鹽政往來干預奏章事件兩淮鹺務日形敗壞或竟由若輩欺朦把持所致不可不嚴行查禁著蔣攸銛等將所參情節嚴密訪查如實有在外干預鹽政事務欺朦婪索情弊卽一面將家產嚴密查鈔不准任其寄頓隱匿一面從重定擬具奏欽此

道光八年三月十五日內閣奉

上諭前據福珠隆阿奏籌議積引帶款章程可歸年清年款以收實效當交軍機大臣會同戶部覈議茲據奏上年兩淮奏報滯引已積至兩綱且自道光三年清查以後甲申等綱於

額徵之外每綱又有帶徵銀一百六十餘萬兩統計每年共
應徵銀五百六十餘萬兩積引日增帶課日重均應設法清
釐該鹽政請將舊引全行統銷欠款全行遞緩從此可期年
清年款係爲剔清積弊整理全規起見惟統引數及兩綱之
多帶款遲至五年之久其戊子等五綱折免疲商引課歸入
通綱代賠雖帑項無虧於運務亦非正辦等語兩淮鹽引滯
銷商力疲乏未銷舊引日漸加多見在應開戊子新綱若令
新舊並銷不能以一綱行運數綱之引且恐舊引未清新引
又積必致挪新掩舊帶款徒屬虛名正款仍無實濟旣據該
鹽政奏稱從此引目課賦必可年清年款著准其將淮南丙

戊正帶半綱淮北乙酉殘綱丙戌全綱及淮南淮北丁亥全綱並丁亥以後淮南灑帶戊寅各引全行統銷賠完引課並將留運丙戌以前殘引改於本年二月奏銷期內埽數銷完卽自戊子年起專辦本綱新引每年應交課銀按限全清所有折引賠課及免完雜款均著歸淮南通綱於當年帶完限以五年歸復十分全額後自癸巳綱起將應賠丁亥以前統引各解款分作十綱帶徵俟徵完後再自癸卯綱起將清查案內舊欠帶款未完二十七限銀兩仍按原限接徵歸款其辛卯綱引亦毋庸提出分年帶運惟丙戌丁亥兩綱歲支懸墊一款道光三年戶部於兩淮清查案內奏明嗣後不准再

有墊撥今甫經數載又有懸墊銀至二百二十五萬兩之多豈得任令久懸著卽於戊子等五綱內分限歸還以清庫項其戊子等五綱每綱總以徵足銀四十五萬兩爲斷癸巳等十綱每綱總以徵足銀九十四萬六千四百兩零爲斷分解各款卽於此內均勻撥解不得將數少者先行完報以杜趨避並著該鹽政督同運司先行查明淮南未銑丙戌半綱及淮南北留運丙戌以前殘引應徵各項課款銀數共有若干分別應撥應解迅速報部並自本年戊子綱爲始按四季行鹽之法飭商按季銷完徵齊正雜錢糧入於春秋季報聽候撥用其每年應解京外帑利匣費等項向不專案報部無可

稽查易滋弊混嗣後著於起解時逐案呈報毋稍遺漏至每綱鹽斤加價銀一百八十餘萬兩本係出自編氓與商課並無干涉著仍照戶部前議由司道各庫按三箇月徵齊造報餘俱照所議辦理此係朕格外施恩該鹽政務督同運使將新引新課按綱埽數全清卽癸巳以後各限帶徵銀兩亦必應依限報完不准屆時再行請緩儻有分毫蒂欠卽將該商人查抄治罪並勒令通綱攤賠立時完繳不得復有拖延仍將督催不力之鹽政運使交部加等嚴議朕言出法隨不能稍從寬貸也欽此

道光九年五月初四日內閣奉

上諭兩淮應徵正雜各課及京外各衙門解款共銀四百餘萬兩前經軍機大臣會同戶部議令自戊子綱爲始將正雜各課銀二百餘萬兩按季徵齊入於春秋季報聽候撥用其應徵京外各衙門解款並蔭斤變價銀約共二百萬兩亦令將起解款項隨時逐案報部至奏銷時仍將全綱額徵銀四百餘萬兩分款分數詳晰註明隨同奏銷各冊送部備覈朕以兩淮商力雖疲經此一番調劑停舊徵新商力稍紓藉以專辦新綱必可年清年額是以特恩允准茲據戶部奏該鹽政造報戊子引課僅據報完正雜各課銀二百餘萬兩其應徵京外各衙門解款約二百萬兩是否照數解完並未彙同造

冊送部未能全數解清已可概見至已完正雜各課銀二百餘萬兩除據報解京協各餉六十餘萬兩外其餘應起解銀八十萬兩尙未全行起解存庫銀六十餘萬兩亦未全行入撥更難保無虛報已完情弊並據另片奏戊子正綱引課內淮北商人借出底馬銀十九萬四千五百五十餘兩亦應於九年二月內繳完該鹽政輒以尙未屆限應行扣除另報顯係以未完銀兩藉詞畫扣規避處分等語是甫議停舊徵新戊子一綱卽不能照額全完勢必又形積壓該鹽政前奏年清年額竟是徒託空言所辦何事著福珠隆阿督飭運司將戊子綱應徵京外各衙門解款銀二百餘萬兩迅卽分別報

解全完其已完正雜各課銀二百餘萬兩除已報解銀六十餘萬兩外下餘銀一百四十餘萬兩應分解者速行批解應報撥者存貯候撥仍遵前定章程將全綱額徵銀兩分款詳晰註明補行送部此外尙有帶徵丙戌丁亥歲支懸墊初限銀四十五萬兩亦卽分晰查明撥解勿稍延宕其畫扣出借淮北商人底馬銀仍作未完彙入額徵數內覈定分數另冊送部開參該鹽政自此次飭諭之後務當逐一查明詳悉覆奏如再有支飾含混自問當得何罪朕言出法隨勿自貽伊戚欽此

道光十年正月二十日奉

上諭軍機大臣寄諭大學士兩江總督蔣攸銑湖廣總督崑孚
江西巡撫吳光悅河南巡撫楊國楨兩淮鹽務見在敝壞已
極固由歷任鹽政辦理不善而引滯課虧亦未必不由於私
梟之侵越上年福森奏請赴楚會同該督撫設法疏銷朕以
江西見亦滯銷令該鹽政便道至江西一併查看惟淮鹽之
累總由引積而疏引之法首在緝私私鹽之爲害不獨有妨
引課且梟徒聚集擾害地方尤爲可惡淮鹽引地最廣各口
岸私販眾多該地方官或以事涉鹽務意存畛域並不實力
緝拏致梟徒毫無顧忌愈積愈多勢將何所底止著各該督
撫嚴飭所屬文武員弁認真巡查遇有大夥私販立即嚴拏

懲辦務期奸究斂迹鹽務日有起色儻因循不辦以致私梟充斥惟各該督撫是問欽此

道光十年二月初八日軍機大臣等奉

上諭朕聞河南陳州歸德例食蘆東引鹽地方與汝甯光州例食兩淮引鹽各屬壤地相接鹽價多寡懸殊數日往還卽獲倍利該處匪徒罔知法紀聚眾興販由歸德之鹿邑陳州之項城等縣置買或以驢馱或以車運每起數十人至二三百人不等明目張膽挺刃各持晝夜南行毫無顧忌所過州縣有本地土棍每一頭目率領夥匪多人各分地界沿途守候私鹽經過勒成械鬪地方官耽逸畏難希圖息事不肯認真

辦理率皆化大爲小化小爲無有息縣著名土棍李福不但包販私鹽竟敢窩藏賊匪各處竊掠更於農民耕種之時奪取牛隻公然待失主持錢贖取屢經犯案該上司催緝行提總未拏獲如此類者尙恐不止一縣一縣之中亦不止此人聚時與販散則卽肆劫掠曳刀手捻匪紅鬚子皆由此出上年汝光一帶雨雪無多收成未能十分豐足該匪徒卽夥出滋事乘機竊劫地方行旅深受其害該管文武各員所司何事楊國楨由藩司升任巡撫在豫有年竟毫無聞見若任聽梟徒肆行無忌是不特有妨礙政抑且貽害閭閻著將梟匪出沒情形密行查訪切實覆奏無許稍有諱飾自干咎戾

其息縣著名匪徒李福何以屢經飭屬查拏迄未就獲務卽勒限嚴緝速獲懲辦以靖地方儻有包庇隱匿情弊並卽嚴查究辦勿得再任延玩懍之愼之欽此

道光十年四月十二日軍機大臣等奉

上諭嵩孚奏湖北湖南兩省堵截鄰私情形一摺前因行銷淮鹽口岸私梟充斥降旨令各該督撫嚴飭所屬認真查辦茲據嵩孚查明湖北湖南兩省設卡巡查並委員密訪飭令藩司鹽法道籌添經費期歸周密漢岸行銷淮鹽引地最廣各路鄰私侵灌尤甚該督因緝私經費不敷見議籌添必須嚴飭所屬文武員弁及坐卡緝私委員認真查拏若遇大夥梟

徒得規縱放轉藉查緝私鹽擾害行旅是不但徒糜經費於
鹺務民生有何裨益見已諭知琦善嚴飭濱江營汎州縣稽
查銅鉛船隻夾帶私鹽此外凡鄰私侵灌及梟徒出沒地方
著該督嚴查密訪督飭所屬不分畛域認真辦理欽此

道光十年閏四月軍機大臣等奉

上諭有人密陳兩淮巨梟黃玉林以儀徵老虎涇水次爲滙聚
籌運之所以湖北之陽邏藍溪爲屯私發賣之處大者沙船
載數千石三兩連檣由海入江小者貓船載百石百十成幫
由場河入瓜口器械林立輓轡轉運長江千里呼吸相通甚
則劫掠屯船轉江之官鹽每次以數百引計各路關隘俱可

賄屬巡役明目張膽任其往來資本既多黨與益眾公然立
有約束於販私之外不許有劫盜客商等事以爲要結人心
之計且聞該犯於大小衙門俱有勾結耳目凡有舉動無不
先知上官爲屬員朦蔽或陷於不知下僚以畏蒞苟安相期
於苟免且恐釀成事端反蹈辦理不善之咎以致上下相蒙
惟恐多事近見該督撫所奏以儀徵爲私梟窩據之所請將
王用賓調補是督撫等亦未必不慮及此王用賓前在沐陽
任內勒於緝捕自係能事之員然此等巨梟聲勢已重豈縣
令一人所能制伏而巨梟不除又何以清鹽務而杜後患等
語江南爲腹心重地此等巨梟肆行無忌地方官豈竟毫無

聞見若恐查拏激變不及早翦除相率容隱是不第爲害齟
務日久養癰貽患必致釀成他變蔣收結接奉此旨務當不
動聲色密速掩捕一面將辦理情形先行由驛覆奏惟該犯
聲勢已重黨與必多江海船隻時常往來在官人役習其耳
目若稍露端倪或聚眾拒捕或聞風遠竄尙復成何事體著
該督酌量情形如須藉用兵力卽當隨宜調度儻江省文武
員弁於辦理此事不能得力他省文武各員內如有該督稔
知其可備任使者亦卽據實奏明飭調前往總期將黃玉林
一犯先行拏獲嚴究黨與盡絕根株旣不可輕率僨事亦不
可任令潛逃愼之愼之欽此

道光十年八月初八日軍機大臣等奉

上諭陶澍覆奏兩淮鹺務投首各犯情形儀徵鹽梟黃玉林據陶澍查明白投首後兩月以來尙屬安靜守法亦未別滋事端並拏獲梟犯李玉良等十二名且有聞風投首多人陸續在運司處聽候指使擬擇其足資緝私者酌留鹽務充巡其餘分別編入營務保甲等語兩淮鹺務敝壞已極原不止私販一節卽以私販而論亦不止黃玉林一起前此准令梟犯黃玉林效力自贖原係權宜辦理若因有自首免罪之條遂將販私之人紛紛招集成何政體且見在黃玉林等一起陶澍等已不能妥爲安置儻再有心招致日積日多又將如何

安插黃玉林一犯本有應發原配流罪其夥犯伍步雲等八
名隨同販私不記次數斤數亦有應得之罪見已准令指引
緝私卽能拏獲巨窩積梟官引得以暢銷亦祇可寬其既往
不得冀倖格外恩施卽入伍食糧亦斷不准行但圖苟免如
不能立功自贖仍當從重加等治罪陶澍等務當隨時體察
籌計萬全斷不可遷就一時遇有投首者濫行收納使奸徒
無所倣畏儻辦理未能妥協於鹺務旣無裨益轉致養癰貽
患別滋事端陶澍等自問當得何咎懷之慎之至商人旣充
總商卽當一體辦運若並不辦運復藉辦公爲名攤派散商
所獲之利轉加於辦運者數倍乘機壟斷不可不嚴行飭禁

該處總商鄒同裕鮑有恆據陶澍奏均不辦運著卽行革退不准暗中影射自後辦事陶澍等卽督飭運司另招股實之商充補並明立章程刪除浮費以肅鹺政欽此

道光十年九月十五日內閣奉

上諭嵩孚等奏查拏私鹽一摺所辦好前因兩淮鹽引滯銷私梟充斥降旨令各該督撫等督飭所屬實力查拏茲據嵩孚等奏自本年三月以後各卡文武員弁暨各州縣先後報獲私鹽二十五起人犯二十九名計鹽一萬八千餘斤又據湖南報獲私鹽四十三起人犯一百六十五名計鹽二萬三千餘斤可見私鹽侵占一經嚴旨飭拏該二省卽緝獲六十餘

起之多此後當倍加振作認真查拏以收實效所有江廣幫船經由搜鹽之處隨查隨行毋許停泊見屆回空之時務當嚴查夾帶並嚴飭由川入楚各州縣於銅鉛船隻過境查驗有無多帶駁船並令各卡員搜查如敢越卡直下卽行拏究其界連河南四川各州縣著飭令會同營員嚴拏查辦遇有大夥私梟不分畛域協力擒拏不得僅將零星小販報獲塞責儻有兵役人等得規庇縱或藉端擾累行旅必應從嚴懲治並將該管員弁據實參處該督等當遵照前旨督飭地方官實力查緝毋得日久生懈視爲具文欽此

道光十年九月二十六日軍機大臣等奉

寄諭江西巡撫吳光悅有人條奏江西吉安府屬之萬安縣爲水陸要道凡由廣東至南安贛州而下者必經該處行走向設有查鹽快船派差巡邏以防私梟過境近來差役等於私鹽船隻每得錢賣放而於過往商船查無鹽斤輒將衣箱貨物傾囊倒篋任意盤折箱內銀兩肆行搶奪復向每人各索查看錢數千至十數千不等客商赴縣控告該差役卽豫將私鹽安置縣堂誣指夾帶眾役一詞不容分辨且派出衙門書差人等勒索規錢使商民受罪含冤資本蕩然以故商賈吞聲畏如狼虎等語地方設立查鹽快船原以杜絕私梟非爲盤查行旅若如所奏情形差役等藉端滋擾誣陷善良是

附錄卷之三
私鹽得以安然過境而過客反受害無窮豈不大干法紀一處如此恐他處亦所不免著該撫密加訪察嚴飭所屬有鹽卡地方實力查拏如有前項差役擾害立即拏獲嚴辦儻仍前怠忽任令差役恣橫商民被累一經發覺必當從重懲處決不寬貸欽此

道光十年十月十六日軍機大臣等奉

上諭陶澍奏遵旨將鹽梟黃玉林正法並籌辦大概情形一摺黃玉林一犯業經正法其隨同投首之伍步雲等八名於黃玉林復圖販私是否知情同謀必應嚴行根究該犯等見已提至江甯省城收禁委員審辦著該督於回署後親提各犯

審訊明確按律定擬具奏至老虎涇地隸儀徵爲淮南監掣
捆鹽之場兼係泊船馬頭據該督奏該處舟航櫛比時有私
鹽船隻雜出其中其代爲雇覓掩藏抽分微利謂之外代黃
玉林之外尙有回倚各匪在彼爭占等語此等匪徒見在雖
因懲辦黃玉林後四散逃走而利之所在已散者難保其不
來不可不實力查拏以淨根株該處情形據奏不在舉徒之
冒法販私而在小民之情迫食私且販私者不盡在舉徒而
商廝商夥與運鹽之江船夾帶實甚見交冬令若再不稱掣
行運則此捆鹽之夫役數萬人何從得食尤應籌度善策妥
爲經理陶澍身任兩江總督兼轄鹽務責無旁貸於該處私

臬應解散者卽當設法解散應緝拏者卽當飭屬緝拏總使私梟斂迹鹽務日有起色方爲不負委任至老虎涇及丹徒江都扼要之處如何移駐官兵彈壓之處著該督酌量情形詳細籌議具奏欽此

道光十年十一月初三日奉

上諭鍾靈奏請革除積弊裁節浮費及勒限追還商借並籤充總商等語兩淮鹽務疲敝自應逐漸清釐茲據該鹽政查明每綱運引不能全清則應徵之數不能足額凡遇撥解緊餉或趕辦奏銷輒令商人趕課名爲預納減納由庫內加以貼息貼色並有外支雜項浮費繁多以致庫貯墊貼日多應解

應支各項俱無以應支解自係實在情形著照所請將預納減納貼息貼色等事永遠禁革其外支雜項辦貢辦公各浮費大加裁節定以准數支數不准逾額再商借各款應卽分限勒令繳還如有違延或繳不足數按名查抄治罪並查明殷實諳練之商奏籤充總商辦運以期清釐庫貯整復舊規欽此

道光十年十二月二十一日內閣奉

上諭據王鼎寶興奏請將兩淮鹽務改歸總督管理一摺兩淮官引滯銷鹺務疲敝見據王鼎等奏稱由該鹽政無管轄地方之責文武員弁均非所屬疏銷巡緝難期令行禁止著將

兩淮鹽務改歸兩江總督管理所有鹽政一缺著卽裁撤鍾靈著回京當差其會議酌定鹽務章程十五條著照所議辦理欽此

道光十年十二月奉

上諭據恆榮奏兩淮欠解淮關鹽鈔銀兩計未解七季銀一萬七千五百兩著查明因何遲延據實具奏欽此

道光十一年正月初二日奉

上諭鍾靈奏清查覆核明確一摺著陶澍卽將該運庫實墊各款及占礙銀款詳晰查明單內所開數目是否屬實其墊占銀款如何歸補及綱分如何疏通著陶澍妥爲籌議查覆具

奏欽此

道光十一年正月二十七日軍機大臣等奉

上諭陶澍奏接受兩淮鹽篆並陳見辦情形一摺據稱兩淮鹽務積疲之餘章程甫立節目尙多如裁浮費去根窩慎出納禁淹消散輪規減價敵私諸款皆商情所不樂應申明國法從實妥辦一有瞻玩卽並其從前弊混之罪追革查鈔至文武員弁向於疏銷巡緝不肯認真力查甚至得規包庇必應整飭等語見當整頓之際功令森嚴該督務須實心查辦力除積弊俾各商及員弁等咸知儆畏於銷引緝私方有裨益至所稱見在商人力能辦運者不過二三十家新商籤募尙

須時日兼之漢口積引不下數千萬畝非三兩月所能罄盡
江西情形亦然前綱旣滯則辛卯新鹽卽截清界限於春月
開綱而行抵楚西各岸已在夏秋之際明歲奏銷勢不能如
期完竣等語自係實在情形所有明歲奏銷著准其稍寬時
日屆期奏明辦理此後仍當年清年款不得復蹈故轍其餘
未盡各事宜并著該督隨時察看分別奏咨辦理該督身受
重恩總當任勞任怨悉心籌辦力圖振刷以期鹽務日有起
色勉副委任方爲妥善又奉

硃批諒該督亦必不肯甘蹈曾燠等之覆轍也欽此

道光十一年二月十一日內閣奉

上諭陶澍奏恭繳鹽政養廉裁減浮費一摺所奏甚是兩淮鹽政每年額支養廉銀五千兩向在雜款應解項下動支見在鹽務改歸總督管理其應支總督養廉優厚足敷辦公所有鹽政應支養廉銀兩著歸入節省項下解交戶部充用至鹽政衙門浮費較多除緝私賞號及經書人等工食均裁減四成巡捕匠作等項全行裁汰此外執事人役應需辛工紙張飯食分別裁併酌留統計前後裁減每年費用銀十六萬兩有零其外支浮費及運司衙門濫支各項均著查明一併刪減該督務當隨時整頓以節浮費而暢行銷欽此

道光十一年二月十一日軍機大臣等奉

上諭陶澍奏鹽政衙門每年春秋應進

陵貢請改歸蘇州江甯兩處織造置備恭進等語兩淮鹽政衙門每年應辦貢品內春秋

陵貢係隨時備辦據陶澍奏該督職任三江時有出省事件恐得信較遲途中難以趕辦請改歸織造辦理所奏亦是惟此項貢品向係兩淮鹽政備辦蘇州江甯兩處織造均未承辦見在該處鹽政業經改歸總督管理所有此項貢品仍著該督照舊置備呈進毋庸令織造辦理欽此

道光十一年二月內閣奉

上諭盧坤等奏籌銷楚岸積鹽並查出重斤懇恩從寬罰令量

減售價以便民食一摺楚省額銷淮鹽據該督等查明見報存岸及載運在途鹽數已有六十一萬餘引之多幾占一年銷額並查出短少鹽色及重斤夾帶之弊本應將該商船戶斷夥等分別究懲因人數過多懇恩寬其既往責令該商減價售賣以溢出之重斤抵補減售之價值於商本不致大折可以稍示薄懲所有查出重斤著加恩一體免其究辦罰令各商每包減價一成售賣以期速銷其辛卯綱到岸新鹽毋得仍前套搭並著此後查照奏定章程由淮實發水腳嚴禁扣價買裝以杜透私盜賣諸弊至見在存岸鹽船有歷一年十月之久尙未開封者雖到船月分多寡不一儘可酌數開

售舊照所議上年正二三四等月到岸最久之船計五萬餘引合爲一次先行儘開其在後月分到船數多者一月一開到船數少者併爲兩三月一開總期廣爲疏銷俟新綱運岸隨到隨售永除封輪名目其在場在楚浮費見已逐加釐剔著該督隨時稽查俾成本永遠輕減民間無虞食貴並著督飭所屬嚴緝鄰私仍於漢岸江船聚集之處酌派幹員設卡稽查以杜盜賣渰消各弊該督等務當認真整頓俾積弊悉除離務日有起色不可有名無實致干咎戾欽此

道光十一年三月十七日內閣奉

上諭楊國楨奏行銷淮鹽引地籌議章程一摺前因陶澍奏淮

鹽行銷引地散在各省請飭一體巡緝當經降旨飭令該督撫各就地方情形妥議章程明示懲勸茲據楊國楨覆奏河南汝甯府並光州所屬十四州縣例食淮鹽該撫於上年親往查辦水路隘口添設卡座責成地方員弁隨時巡邏杜絕私販見在明定懲勸章程咨會兩江督臣飭令該商迅速運鹽到岸俾梟販搶匪無從乘隙爲姦其毗連楚省地方並咨明該省督撫飭屬堵緝以杜偷越著照所請嗣後豫省行銷淮引如果地方官緝私出力督銷三年如額卽咨部量予議敘如督銷不力或巡緝廢弛卽嚴行參辦並著兩江總督嚴飭淮商辦運迅速到岸毋蹈從前稽遲懸引積弊其行銷潞

鹽南陽府屬界連楚省淮鹽引地著湖廣總督湖北巡撫一體飭屬堵緝各該督撫等務當恪遵前次所降諭旨督飭地方文武員弁無分畛域併力緝巡俾官引暢銷私販淨絕勿得日久生懈致干重咎欽此

道光十一年四月初五日內閣奉

上諭王鼎等奏會議糧船買帶食鹽嚴禁夾私一摺天津爲運道總滙之區糧船往返每於例准買帶食鹽四十斤外多帶鹽斤以致妨礙蘆綱亦且侵占淮引茲據王鼎等查明軍船私帶之弊以江廣各幫爲最重實亦不獨江廣爲然其透漏鹽斤之弊以天津爲最甚亦不獨天津爲然沿河一帶囤梟

每於幫船將次抵境先向議定價值造船一到卽用小艇夤夜裝載與其搜獲於旣帶之後不若嚴禁於未帶之先見添派天津分司運同暨天津府知府同知總司稽察並於于家堡楊柳青獨流各處添派鹽務官各一員其甄河地方添派滄州知州就近督率辦理鹽務正當整飭之際該署督等旣經派委多員沿途防範尤當嚴飭各該員等實力巡防認真搜查一面堵截河干囤販一面嚴拏小艇載私有犯必懲毋得有名無實如有差役兵目人等得規徇庇卽行從重治罪其派出各員如不出力查辦著卽參處以清積弊而肅鹺政欽此

道光十一年四月二十三日內閣奉

上諭盧坤等奏整頓鹽務設立章程一摺楚岸淮引滯銷皆由內私外私占塞銷路而治內私尤亟於堵外私見經該督等遴選幹員專駐江船聚集之塘角設立總卡稽查並派員幫同巡察卽查出郭漢玉鹽船船戶盜賣等情在漢關盤獲李之連私鹽萬餘斤又續獲劉大富等雇船裝運腳私二起計重三萬七千餘斤並查近年鹽船動輒捏故淹消多有划船乘機搶奪見飭員會同總卡委員各派丁役不分晝夜在於各壩口梭織巡邏遇有捏漏淹消及搶鹽划船並有盜賣輕載卽分別查拏驗究其江干渡划擺江魚艇等船舊有編號

章程業飭各該縣轉飭汛員督率保甲將所管水面一切大小船隻分類編號大書姓名各歸各埠造冊報縣均送總卡隨時稽查並將存河鹽船按幫取具連環保結辦理尙屬周密如果各該縣暨委員認真稽察將帶私之船遇案獲究淹消盜賣之風自必斂戢惟所拏必須私梟大夥方准奏請鼓勵該督等務當嚴飭所屬實力巡查使積弊胥除官銷日見暢旺以肅鹺政欽此

道光十一年五月初八日內閣奉

上諭陶澍奏籌議糧船夾帶私鹽請扼要稽查一摺江西湖南湖北安徽等省軍船往往於回空時夾帶私鹽必應嚴行查

禁據陶澍奏天津一帶于家堡楊柳青獨流等處及滄州之
甌河地方見經直隸委員巡查著琦善嚴飭該員等查拏私
艇堵截囤販有犯必懲以杜透漏迨入江南地界著該督派
委徐州鎮道大員嚴密迎查兼防河北漏私至楊莊句水起
卸渡黃後應於揚州之搜鹽廳停泊待查惟該處河道窄隘
易致阻礙行船著該督酌派文武員弁量擇二游河道稍寬
之處照例搜查隨查隨放如有例外夾帶鹽斤悉行起除根
究出本買鹽之風客加等嚴治幫弁旗丁一併參懲至駛出
大江以後著將瓜洲儀徵搜查委員派至九江蕪湖等處會
同各該關監督按船嚴查所有水手人等向遇搜查嚴緊輒

棄船四散以圖挾制委員恐誤歸次往往敷衍了事遂至肆無忌憚自應申明定例一船之內丁舵爲主水手有犯責在旗丁如有逃匿一面嚴拏究懲一面督飭弁丁另雇水手駕船趕幫受兌不致有誤該督務當督飭所屬認真稽查俾糧私淨盡以清弊源而收實效欽此

道光十一年五月初八日內閣奉

上諭陶澍奏淮北商力積疲請暫籌借項官督商運等語淮北商力疲累已久此時招商籤辦難得其人且各處需鹽孔迫不得不先籌運濟據該督查明永豐壩見有存貯歷次運庫發銀收賣官鹽九萬一百七十二引應擇誠實商人借給水

腳領運分赴各岸並遴員督運俟其到岸售有課銀收回應完錢糧及鹽價借項繳庫歸款其各滯岸銷鹽無多卽由附近暢岸隨時撥往接濟所需運腳銀兩著照所請准其在於己丑殘引加斤案內帶徵課銀催商趕緊交完先行酌動銀二十萬兩以十二萬兩爲前項運腳之需其餘八萬兩因海州分司所屬板浦中正臨興三場運商久不捆鹽竈戶困苦著查照上年原奏辦理趕緊收買卽將收買之鹽存貯各場俟本年秋單撥運至壩飭商領運繳價還庫所有收買發運事宜卽責成淮北監掣同知陳在文妥爲經理仍趕緊招商接辦以肅鹺政欽此

道光十一年五月十二日內閣奉

上諭鄧廷楨奏籌議查禁糧船夾帶私鹽各章程一摺安徽省過境糧船最多湖廣江西三省夾帶蘆私淮私皆有棍徒陸續收囤見經該撫查明長蘆私鹽則出自天津之公口岸淮南私鹽則在揚州高郵寶應境內由水路上船淮北私鹽則由海州沭陽縣陸路而至著長蘆鹽政兩江總督於糧船入境之先嚴禁公口岸不准售私並密派員弁查明向來窩囤處所嚴密緝拏囤鹽本犯從重懲辦其包庇知情之地保鄰右分別治罪並將窩房拆卸變價入官更有一種匪徒盤踞馬頭專爲糧船通綫散銷從中取利名爲青皮其著名馬頭

如當塗之四合山銅陵之大通鎮桐城之樅陽鎮五倡拐望江之華陽鎮無爲之土橋最爲扼要此外不著名者亦復不少其積慣青皮如山東岳泳庭等已經該撫飭屬查拏報獲提省審辦其聞拏遠逸者恐將來回空時仍踞舊地亦經該撫飭令地方文武留心察訪並究出包庇窩留之人按名拏辦至販私正犯名爲風客每年帶貨北上及回空時即將貨本買私所獲利錢與丁舵水手均分朋比爲奸必應認真查禁嗣後如有拏獲販私舵工水手卽著追究風客住址姓名拏獲到岸按律懲辦舵工水手免其治罪若甘心包庇不肯供指卽比照販私三百斤以上不供出賣鹽人姓名之例於

本罪上加一等治罪儻係挾嫌誣扳仍照誣告例加等辦理至該撫所稱舵工水手往來挽運工價不敷請於例帶土宜之外加帶土宜三十石一律免稅是否可行著署漕運總督吳邦慶體察情形酌議具奏欽此

道光十一年五月二十日內閣奉

上諭陶澍奏酌定楚西等省鹽船到岸限期並委員巡緝以杜夾帶盜賣一摺楚省商運江船行走限期舊例已爲周密惟運鹽至江西省向未定有限期據該督查明程途比較楚省限期酌定著照所議小船定限二十日中船定限三十日大船定限五十日責成淮南監掣同知於商人雇船運鹽前赴

楚西視引數之多寡定雇船之大小以裝滿九分爲率不許留有空艙致多夾帶至安徽河南各口岸鹽船旣分江湖兩運並有換船起駁之處其船並無大小著以淮安城北烏沙河開運之日起定限每日行三十里將贏補絀按程途之遠近扣日期之多寡責成淮北監掣查驗開行均不得留艙夾帶仍將開行及到岸限期並喫水尺寸另給催趲限單抵岸報驗由各該鹽道認真查對儻有中途風水阻滯照楚省舊例准其據實呈報如逾限不到卽行查辦至夾帶賣私之弊楚西一路爲尤甚往往鹽已賣盡卽捏報淹消從前曾委武職員弁巡緝嗣經裁撤著仍復舊規每年酌委參遊守備或

文職二員自儀徵大江溯流巡緝至湖口分路一往江西一往漢口仍由原路查回儀徵換員前往接巡責令訪查夾帶賣私捏報淹消等弊並令沿途催趲行運毋任稍有逗遛其所委之員該督仍隨時查察勤惰分別勸懲總須認真辦理杜絕諸弊俾鹽引暢銷鹽務日有起色不可虛行故事日久仍視爲具文以致有名無實欽此

道光十一年五月奉

上諭戶部奏核議兩淮墊占各款分別辦理一摺兩淮所有占礙各項銀款共一百二十三萬九千四百五十三兩零據戶部查明與前任鹽政鍾靈清查截數以前墊用銀兩事同一

律見既未能歸補著照該部前議准其一併暫緩帶徵俾免牽掣仍著該督一俟引鹽暢銷卽行趕緊籌補毋得借詞延宕至本年辛卯開綱以後該運庫徵收各項銀兩自應遵照新定章程分別正雜另款存貯前經該部奏明永遠不准再有挪墊責成該督隨時嚴密稽查如有陽奉陰違立即指參究辦欽此

道光十一年六月初十日內閣奉

上諭吳邦慶奏請嚴定查禁回空糧船夾帶私鹽章程一摺回空糧船經由直隸山東淮揚一帶裝載私鹽最爲鹺務之害前飭該署漕督等妥議章程茲據奏稱空船夾帶總在私鹽

旺產之區請於各該處多派幹練之員會同押運各弁認真防範並據查明天津以南之于家堡楊柳青獨流軹河等處天津以北之北倉丁字沽西沽海口及故城縣之鄭家口頭望二望三望直東兩省交界之油坊渡口驛並山東境內七級聞阿城間張秋一帶均係私鹽裝載之地總由營汛員弁得規包庇以致私販越境而行深堪痛恨著直隸總督責成天津鎮總兵嚴督沿河營汛弁兵上緊訪拏巨梟窩固飭令該管州縣多派幹役一體會緝並著山東巡撫揀派明幹副參大員酌帶弁兵會同該管州縣在油坊渡口驛等處分投上下實力查拏至江境黃林莊以南著兩江總督飭令徐州

鎮道嚴密巡查兼防河北漏私並於揚州上游河寬之處酌
派文武員弁帶同兵役照例搜檢放行再派瓜洲儀徵委員
至九江蕪湖等處會同各關監督按船嚴查其餘濱江等處
一體訪緝如搜獲私鹽訊係何處偷漏除將丁舵人等從重
辦理外卽將該管地方文武員弁及失察之押運廳弁分別
嚴參以示懲儆經此次嚴立章程以後該署漕督等務當各
飭所屬認真查辦以期梟販淨盡鹺務肅清不可徒託空言
仍至有名無實欽此

道光十一年八月二十八日奉

上諭白鎔等奏兩淮運商引鹽請復執窩行運舊規以杜流弊

等語著戶部議奏欽此

道光十一年九月初三日軍機大臣等奉

上諭顧莼奏請變通鹽法一摺據稱分地銷鹽仍從商辦則私梟總不能禁止緣鹽之買於場竈官有例價私販則價重於官官鹽有課私販無課無課則價輕加以吏弁與之交通關津從而賣放雖有緝私之名而無緝私之效惟在變通鹽法使之各遂其生莫善於課歸場竈人人皆可爲商不分官買私買價歸於一可杜偷漏之弊任其所之則地遠而價貴者人爭趨之其價必平雖偏僻之地亦不至有淡食之虞此法旣行可養無數貧民卽可化無數莠民則保全者尤大前此

諸臣議以爲窒礙難行者其一以竈丁皆貧民難責以起課
今若鹽歸丁賣何患其貧其一以池繳半係竈產悉令垣商
經理以己業聽命於人情所不願今既不設官商其意正與
之相合其一以課額爲數甚多鹽場微員不能任此巨帑今
兩淮鹽政改歸兩江總督管理運使等官督率分辦事無掣
肘他省有鹽之所皆設官如舊何至不能勝任等語整頓鹽
務總要暢銷裕課方爲明效茲據顧純奏請變通鹽法與該
督見在辦理章程孰爲妥善著陶澍悉心籌畫從長計議總
須於鹽務實有裨益不可稍存成見該督旣管理鹽政責無
旁貸若經理不善咎有攸歸務宜興利除弊以冀鹽務日有

起色方爲不負委任欽此

道光十一年十二月初九日軍機大臣等奉

上諭本日內務府奏議駁陶澍請將兩淮變價錢斤暫緩領變一摺並另片奏催解變價餘錢銀兩已降旨依議矣每年盛京等三處進到錢斤向係將餘錢分交兩淮等處變價所有本年應發兩淮變價錢斤著陶澍迅速派員赴京承領發商變價毋得遲延又兩淮歷年欠交錢斤變價銀九十六萬四千餘兩應飭原領變價錢斤各商將此項積欠銀兩作爲帑本按一分生息每年息銀十一萬五千六百餘兩遇閏加增自道光十一年起應得利銀卽於次年按數解交內務府以

備公用著該督卽飭令各商遵照妥辦其餘應交各款積欠銀兩著該督派員按數解交以清款項又內務府三旗舊養育兵錢糧一款每年係將細小餘糧發交兩淮變價以備支放所有道光八九年兩淮共應交此項餘糧變價銀四萬二千九百兩至今尙未交納實屬延玩著陶澍一併趕緊委員按數解交毋許再有遲逾致干重咎欽此

道光十一年十二月十三日軍機大臣等奉

上諭據御史卞士雲奏江蘇淮安揚州所屬下游州縣向有小舟名曰艚船常以捕魚爲業本年因水勢稍大借饑民名色或數十船一起或數百船一起私梟乘勢勾結令其載運私

鹽由戚家漢孔家涵等處徑出運河並沿江一帶地方售賣公然設立章程有屯戶過載架護名目派人各司其事船大者裝至千斤小者數百斤其聚集之處聞拏則婦女撒潑不拏則強壯滋事秋閒曾有壽州等處回民許姓曹姓多人在三岔河地方因與艍船爭賣私鹽有然放排槍之事匪徒結黨互爭難保不別生他故該處上司非不委員查緝每日報獲私鹽無如艍船來往如故誠恐兵役人等先於搜查時預爲說明每船抽留若干以爲搪塞保護之計該地方官粉飾消弭竟不嚴行禁絕並聞該梟匪等於江南之觀音門安徽之樅陽鎮立有馬頭銷售艍船所載私鹽等語近來江船夾

帶與大幫私販俱漸斂迹乃梟徒另設此法逞其販私之計
往來擾累徒黨橫行殊屬目無法紀著陶澍程祖洛鄧廷楨
嚴行查辦先拏句結之人使艍船無所倚賴再押令各艍船
自歸本籍違者重辦其三岔河爭賣私鹽一案並觀音門樅
楊鎮私設馬頭亦著嚴行懲辦以靖私梟至其中實係貧苦
之艍船應否編入冊籍歸於賑務辦理亦著體察情形斟酌
妥辦欽此

道光十一年十二月二十二日奉

上諭陶澍奏開綱以來淮北祇捆二萬餘引較定額不及十分
之一本年將官收竈鹽督商辦運均擇暢銷之岸先行運往

以冀早收庫項而滯岸仍無鹽濟售民間既無官鹽不得不
買向民販竈丁積有餘鹽亦不得不賣與民販等語著照所
請淮北暢岸仍歸商運其餘滯岸卽仿照山東浙江票引兼
行之法於海州所屬之中正板浦臨興三場分設行店聽民
投行購買運銷擇各場要隘之地設立稅局給以照票注明
斤數及運往何處字樣凡無票及越境者仍以私論著陶澍
卽飭運司妥議條款酌量施行該部知道欽此

道光十二年正月二十四日奉

上諭陶澍奏降調道員委令會辦淮鹺等語淮北鹽引滯銷各
岸前據該督奏准於海州所屬之中正板浦臨興三場要隘

設局抽稅及運販價值給票事宜必須熟悉離務之員責成經理以期行之有濟江蘇降調淮揚道鄒錫誦著准其前往淮北督同監掣分司各員察看情形會同地方官確細籌辦其一切給票抽稅章程仍與該署運司俞德淵會議妥辦欽此

兩淮鹽法志卷三

兩淮鹽法志卷三

王同增

制詔三

五二